



Senin, 14 Oktober 2024
Ogen: Kejadin 1: 29-31



Kusikapken Panganndu



Bumi menyediakan segalanya! Enda me jadi sada falsafah man para pejuang lingkungan hidup gelah ula lupa maka kai si ialoken manusia i bas paksa genduari enda rehna i bas kai si lit i bas doni enda, janah tetap nginget maka mbue kal si tuhuna utang ta man doni enda si nggo mereken man banta kesempatan guna nggeluh. Sada ngenca si iarapken doni enda maka jagai dengen rawatlah ia gelah ia pe la pelit guna mereken kai si ibutuhken manusia.

Teridah i bas ogenta sendah, i ja leben itepa Dibata doni enda guna ingan tading manusia rikut ras kelengkapenna kerina guna ketahanan hidup manusia si itamakenna i bas doni enda. Salah sadana e me kerna pangan. Maka kerina sinuan-sinuan si erbuah ras kerina batang kayu si erbuah e me jadi pangan pokok manusia si itamakan Dibata i bas doni enda. Sieteh maka tangtangna manusia nggeluh vegetarian, man pangan arah sinuan-sinuan. Uga ningen manusia mbarenda la sehat adi e kin si jadi pangan utamana. Tapi engkai maka dungna manusia mangani daging? Erkiteken manusia ndabuh ku bas dosa, si erbansa taneh ingan sinuan-sinuan turah nggo kena sumpah Dibata maka la banci lang manusia arus latih erdahin guna erbanca sinuan-sinuan e turah. Nimai kerna si e, tentu la banci lang arus nge ibahan alternatif sideban e me mangani rubia-rubia. Janah teridah nge maka i bas kerina jelma i doni enda, pangan si rehna arah sinuan-sinuan nari jadi pangan pokok i ja pa pe umpamana page, gandum, jaung. Jelas maka tangtangna pe Dibata nikapken sinuan-sinuan e jadi pangan si awalna ipan manusia. Aminna pe manusia e arus erdahin guna mpeturah sinuan si jadi pangan pokokna tapi ingetlah maka Dibata pe ikut erdahin i bas mpeturahsa ras mereken asilna. Si pentingna e me tetaplah erdahin maka arah dahin si ipasu-pasu Tuhan si aloken ulihna maka kita pe banci man guna keberlangsungen hidupta!